

## ASOSIASAUN MANE KONTRA VIOLÉNSIA (AMKV)

### Vizaun Jerál kona-ba Organizasaun no Aprosimasaun kona-ba Jéneru

Asosiasaun Mane Kontra Violénsia (ne'ebé baibain bolu naran AMKV ka Association of Men Against Violence iha lia Inglés) ne'e NGO Timoroan ida ne'ebé foka atu enkoraja mane nia partisipasaun iha luta ba igualdade jéneru nian. Organizasaun ne'e tenta especialmente fó brani atu mane sira hola responsabilidade atu hamenus insidénsia iha violénsia jéneru nian.

AMKV forma hanesan rede nasional voluntáriu ida ho mane na'in 20 iha Junu 2002 no sai formalmente hanesan NGO ida iha 2005. AMKV iha organizadór voluntáriu sira husi comunidade ne'ebé bazeia iha suku no aldeia spesífiku iha distritu hitu (Aileu, Dili, Ermera, Lautém, Liquiçá, Manatuto no Viqueque), maske nia gabinete no staf nasional bazeia iha Dili. Organizadór komunitáriu sira iha kontaktu regular no iha autonomia atu hala'o atividade iha sira-nia área imediatu.

AMKV nia formasaun mosu husi inspirasaun iha *workshop* ida kona-ba violénsia, jéneru no maskulinidade ne'ebé hala'o iha fatin tolu iha Timor Leste durante 2002. Membru na'in rua husi grupu mane Nicaragua nian *Puntos dos Encuentros* maka hala'o *workshop* ne'e no iha apoiu husi organizasaun barak iha Timor Leste, ne'ebé inklui Oxfam Australia no La'o Hamutuk. Mane na'in 38 husi distritu sira iha Timor Leste mak participa. Membru mane na'in 20 ne'ebé participa iha workshop ne'e mak harii AMKV.

Partisipante barak mak senti, *workshop* ne'e hanesan oportunidade dala uluk atu koalia klean kona-ba mane sira nia prátika iha violénsia hasoru fetu no atu reflète ba sira nia an nia funsaun iha kestaun ne'e. AMKV nia diretor ezekutivu daudaun ne'e hanoin katak molok *workshop* ne'e nia laiha koñesimentu diak kona-ba jéneru no asuntu hirak ne'ebé ko'alia kona-ba ne'e. Maibé, bainhira aprende tiha husi *Puntos dos Encuentros*, partisipante barak husi *workshop* ne'e konsege haree katak bele iha mudansa ba forma violentu patriakal ba identidade jéneru maskulinu nian tan ne'e mós importante. AMKV nia fundadór sira decide atu estabelese organizasaun ne'e atu fó apoiu ba maluk mane Timoroan sira seluk iha prosesu mundansa ne'e.

AMKV nia fundadór sira mós simu-hatán katak importante atu harii organizasaun mane nian ne'ebé bele serbisu hamutuk ho fetu nia organizasaun barak ne'ebé ativu hodi buka igualdade jéneru nian iha Timor-Leste. Objetivu jerál ida maka mudansa ba comunidade nia persepsaun katak 'jéneru' ne'e buat ida ne'ebé preokupa de'it fetu sira no la interese ba mane sira atu envolve. Bainhira estabelese organizasaun mane nian ne'ebé serbisu ho kestaun jéneru ninian no violénsia iha Timor Leste signifika katak AMKV nia membru sira dala-barak hetan krítika no mane seluk hamoe sira. Krítika-na'in balu kestiona virilidade atu servisu iha área ne'e; seluk fiar katak mane ne'ebé fó kréditu ba kestaun jéneru ninian hatún mane nia soliedaridade, halo mosu konflitu entre mane no fetu no luta hasoru kultura tradisionál Timor. Maibé AMKV foti argumentu katak prátika kultura Timor nian no identidade maskulina la presiza iha sinónimu ho patriarkia, ho violénsia ka ho diskriminasaun hasoru fetu. Organizasaun ne'e haree katak kultura tradisionál Timor bele no tenki muda atu bele tulun hodi buka hetan igualdade jéneru nian.

<b>AMKV nia Vizaun, Objetivu no Estratejia:</b>
---

**AMKV nia vizaun atu harii sosiedade demokrátiku, independente, no justu, livre husi violénsia no diskriminasaun. Nia iha objetivu atu hasa'e konxiénsia mane no fetu sira nian kona-ba violénsia ne'ebé bazeia ba jéneru no halakon violénsia hirak ne'e husi sosiedade nia nível hotu-hotu. Nia buka atu alkansa ne'e ho edukasaun no forum soru-mutu sira, hala'o advokasia, no harii rede efetivu ida atu halibur hamutuk grupu komidade sira, NGO nasional sira no governu.**

Mario de Araujo, ““Libertasaun ba ema hotu-hotu, la'ós de'it ba mane””: Kazu estudu husi Assosiasaun Mane Kontra Violénsia (AMKV) iha Timor Leste', iha Sandy Ruxton, ed., *Igualdade Jéneru nian no Mane: Aprende husi prátika*, Oxfam, UK, 2004, p. 2.

AMKV buka ativamente atu harii parseria no ligasaun ho organizasaun seluk iha área jéneru no violénsia ne'ebé bazeia ba jéneru. Oxfam Australia parseiru importante ida ne'ebé mak kleur ona halo serbisu atu apoia dezvoltamentu organizasionál no programa atividade sira. Parseiru seluk inklui GAPI no UNFPA, ne'ebé AMKV servisu ho intensidade iha 2006 atu koordena programa nasional ba kampaña Atvizmu Loron 16 Hasoru Violénsia. Durante krizi 2006 AMKV serbisu ho Rede Fetu hodi hala'o análiza ba kondisaun iha kampu dezlokadu sira.

Baze AMKV konjunta ho eskritoriu ONG Luta hamutuk, ONG lokal ida ne'ebé hala'o peskiza no monitorizasaun iha Timor Leste. Organizasaun rua ne'e estabele ona sira nia relasaun iha sira-nia programa edukasaun komidade nian. Iha rai liur, AMKV harii ona relasaun ho grupu movimentu nasional mane hasoru violénsia.

AMKV nia doador prinsipál mak Oxfam Australia, Caritas Australia no UNFPA. Jeralmente fundus sira hato'o ba programa sira ne'ebe spesífiku. AMKV seidak buka fundu sustentável, ne'ebe significa ba organizasaun nia rekursus atu gasta ba kustu lojístiku prinsipál sira, hanesan transporte no ekipamentu eskritóriu nian, ladún adekua. To'o 2006, AMKV nia membru sira maioria ema voluntáriu sira; agora iha ona fundus disponível ba pozisaun diretor ezeutivu.

## **Programa**

### *Reflexaun Internu no Konsellu ba Malu*

Hanesan kontinuasaun direta husi *workshop* ho Pontos dos Encuentros, AMKV nia atividade inisiál ida maka institui soru-motu refletivu internu entre membru sira. Diskusaun hirak ne'e foka ba membru sira rasik nia prátika, sira-nia opiniaun no supozisaun kona-ba sira-nia moris loron-loron no halo oinsa mak bele halo mudansa atu aseguira katak laiha violénsia no aseguira igualdade jéneru nian. Se membru ida la hatudu nia hahalok iha nia vida rasik, ne'ebé nia promove iha nia programa edukasaun komunitária, entaun membru sira seluk bele husu nia sai husi AMKV. Iha parte seluk, AMKV nia membru sira mós rekoñese katak bainhira pesoal rasik mak muda sira-nia hanoin no hahalok, dala-barak hasoru sasidik ne'ebé sorun ho norma sosiál mak iha, rekere apoiu no konsellu husi mane seluk ne'ebé dedikadu hanesan sira.

### *Edukasaun Komunitária*

AMKV nia programa boot liu maka hala'o edukasaun komunitária iha komidade lokal sira. Dala-barak iha sira-nia tempu rasik, hanesan fim de semana, membru AMKV sira halibur mane no fetu hamutuk hodi diskuti kona-ba funsaun no relasaun entre jéneru no asuntu

espesífiku sira hanesan violénsia ne'ebé bazeia ba jéneru. Objetivu programa ne'e ninian mak atu fó korajen no fó pontu sira hahú nian ba comunidade sira, liuliu ba mane, atu halo mudansa imediatu ba relasaun entre jéneru. Diskusaun sira hala'o iha forma partisipativa ne'ebé hamenus nesiedade atu uza hakerek no lee, hanesan ezemplu, uza drama hanesan téknika aprendizajen. Envezde ko'alia iha konseitu abstratu, AMKV prefere mós fó korajen ba partisipante sira atu reflète kona-ba sira-nia vida loron-loron no inventa estratejia mudansa ne'ebé práttiku no bele hetan kedas.

AMKV konta hanesan susesu xave ida ba nia program mak halibur mane lubun boot ida husi fatin barak iha Timor-Leste tomak. Prioridade liu ba comunidade sira ne'ebé izoladu husi informasaun organizasionál, ne'ebé jeralmente sai husi Dili. Bainhira tama iha área foun ida, AMKV dala-barak haree katak atu halibur mane iha sira-nia diskusaun kona-ba jéneru reprezenta prosesu ida difísil atu hahú no tenki hala'o neine'ik. Dala-barak mane sira hatudu rezerva ba buat ida ne'ebé sira haree katak apropriadu de'it ba fetu, fenomenu negativu ida ka buat ruma ne'ebé la eziste iha kultura Timor nian. Atu kombate dezafiu ne'e, AMKV deskobre katak importante organizadór komunitariu sira ne'ebé bazeia iha área ne'e atu serbisu hamutuk ho líder comunidade seluk hanesan xefe suku, xefe aldeia no líder juventude sira. Apoiu husi figura komunitária sira ne'ebé bazeia iha comunidade lokál ajuda atu hetan konfiansa inisiál husi comunidade. Maibé, bainhira AMKV halibur tiha mane sira iha nia programa edukasaun komunitária, AMKV haree katak partisipante sira ko'alia pozitivamente no ho entuziazmu kona-ba sira-nia envolvimentu.

### *Advokasia*

Iha nível nasional AMKVA envolve an iha asuntu advokasia barak, hanesan ezemplu, kontribuisaun atu hakerek presaun ba lejjlasaun kona-ba violénsia doméstika no halo lobi ba Ministériu Edukasaun atu hasai tiha prekonseitu jéneru ninian husi eskola nia kurríkulu. Hatutan tan ne'e, kampaña Atvizmu Loron 16 Hasoru Violénsia ne'e akontesimentu anuál ida importante ba AMKV, ne'ebé organizasaun ne'e iha funsaun sentral koordinasaun ninian hamutuk ho UNFPA no GAPI. Ezemplu husi atividade espesífiku AMKV nian iha kampaña 2006 inklui aula te'in aihan ba mane sira no *workshop* komunitáriu kona-ba prevensaun hasoru violénsia ne'ebé bazeia ba jéneru, iha rejiaun Baucau. *Workshop* hirak ne'e hala'o hamutuk ho Centro Baucau Buka Hatene ninia Programa Dezenvolvimentu Fetu nian.

### **Kontaktu**

Tel: (670) 726 4240; (670) 732 8368  
Email: kontraviolencia2002@yahoo.com  
Alamat: Rua Gov. Celestino da Silva, Farol, Dili (Luta Hamutuk nia sorin)

*Husi: Trembath, Anna no Damian Grenfell, Mapa ba Lala'ok Buka Igualdade Jéneru: Atividade Ajénsia La Governamental no Internasionál nian iha Timor-Leste, Globalism Institute, RMIT University, Dili, July 2007, ISBN 978-0-646-47770-1, pp. 21-23.*